



PERORATIO
CUM
GRATIARUM ACTIONE.

I. **J**Am ad litus rete. Instar enim sagenæ missæ in mare, (a) ex omni genere piscium congregantis Annalium scriptio se habet, quæ sui amplitudine in collectione rerum gestarum in vasto pelago sæculi hujus, quot continet Tomos, tot tu Læstor veluti retis jactus enumeres. Sed ubi ductum est rete, non Judaico more secus litus sedendum ad delectum piscium; quin potius una cum Paulo (b) in littore positus genibus nobis orandum, & gratiæ agendæ Deo, cujus totum id muneris esse cognoscimus; sicque cui cuncta accepta ferimus, eidem dignas laudes pariter referamus; procul abhorrentes ab illorum arrogantia, qui sibi omnia tribuentes, immolant (c) sagenæ suæ, & sacrificant reti suo. Petri namque nobis potius proponimus imitandum exemplum, a quo & rete accepimus ad piscandum (d): qui stupens ad insperatam copiosissimam capturam piscium, procidit ad genua Jesu, a quo se totum intelligeret consecutum. Sed cum omnem gratiarum actionem tanto beneficio impari esse sciret; sese ad humilem peccatorum confessionem convertit, ex abundantia cordis in illud erumpens admirandum humilitatis elogium: *Exi a me, quia homo peccator sum, Domine.* Proci- do & ipse, sed eo humiliter, quo gra-
vius peccans, ad pedes ejus; ut humi stratus, non os tantum, sed omnia ossa mea dicant (e): *Domine, quis similis tibi?* qui tot tantaque confers in immeritum beneficia, quorum excrescent dilu- vio propemodum obruendus, æque cum Petro exclamare compellar: *Exi a me, quia homo peccator sum, Domine,* propriæ conscius infirmitatis, longe impar ad tanti ponderis beneficia subeunda.

Quod insuper ex tanta ac toties re- petita piscatione nec sit hætenus rete, conscissum, sed & ad jactus alios adhuc integrum perseveret; quod, inquam, nec defecerint ex laboribus in senio vires, sed virecant ad opus; totum id gratiæ est Abisag (f) Sunamitidis nostræ, senilia membra foventis, ipsius videlicet sanctissimæ atque purissimæ Virginis operi cœpto faventis, cunctaque nostra curantis, atque feliciter promoventis. Cui pro meritis, quot hujus scriptiois sunt apices, tot fluant gratiarum actionum im- bres, quot syllabæ, tot laudum fontes erumpant fluxu perenni ad vastum illud pelagus confluentes, ex quo omnia prodierunt, ad ipsum dico bonorum omnium copiosissimum largitorem Deum opti- mum maximum: cui semper laus, honor, & gloria in sæcula sæculorum. Amen.

Hic Baronius undecimum Annalium Tomum absolvit.